

DEIPARÆ VIRGINI

SINE LABE CONCEPTÆ

SELECTAS EX UNIVERSA PHILOSOPHIA

T H E S E S

Q U A S

*Indiscriminatim proponit extempore
propugnandas*

IN COLLEGIO ROMANO

COMES LAURENTIUS A PORTA

SEMINARII ROMANI CONVICTOR
ET ACADEMICUS REDIVIVUS

D. D. D.



ROMÆ, ex Typographia Antonii de Rubeis ccccccxxxviii.

SUPERIORVM PERMISSV.

MEMBERS OF THE UNIVERSITY OF TORONTO

THE

LIBRARY

OF THE

UNIVERSITY OF TORONTO

14 COLLEGE ROAD

ATLANTA, GEORGIA

RECEIVED

AT THE UNIVERSITY OF TORONTO

1911

UNIVERSITY OF TORONTO LIBRARY

1911



EX LOGICA

De Idearum Origine, & Natura.

I.



Dei nomen accipi potest vel pro formali actu cognoscendi objectum aliquod, & *formalis idea* dicitur; vel pro quadam objecti specie movente potentiam ad ipsius objecti perceptionem, eique objectum applicante, ut proximè cognosci possit, quæ videtur Ciceronis interpretatio, (1) & in hoc sensu vocatur *Idea obiectiva*. Quamvis autem explicari satis posse videatur quo pacto mens humana per species

ministerio sensuum acquisitas objecta etiam incorporea cognoscat, removendo videlicet peculiare circumstantias & conditiones materiæ, sub quibus sensus afficiuntur; verisimilius tamen videtur, & magis consentaneum tum expressis SS. PP. Loquutionibus, (2) tum prudenti ratiocini-

A 2

nio,

(1) Cic. 1. Acad. Quæst. *Mens sola cernit, quod semper est simplex, & uniusmodi ... Hunc Græci Ideam vocant: nos recte Speciem possumus dicere.*

(2) S. Justinus Martyr in Apolog. *Dei appellatio nomen non est, sed rei inenarrabilis insita naturæ hominum opinio.* Idemque profertur se librum scripsisse de Monarchia, eo consilio, ut insitam a Natura, sed a prava consuetudine obliteratam de uno Deo sententiam resuscitaret ex Poëtarum scriptis. Tertull. lib. 1. contra Marcionem ait: *Animæ a primordio conscientia Dei dos est.* Idemque in Apologet. provocat Ethnicos ad animæ propriæ testimonium, & sic exclamat: *Ob testimonium Animæ naturaliter Christianæ! Cognitionem Dei naturaliter nobis insitam, innatam, inditum, insculptam &c.* appellat Orig. lib. 1. & 4. contra Celsum, S. Hieron. in Job, & in Ep.

ad Galat., S. Greg. Naz. Orat. 24. Euseb. Cæsar. lib. 2. Præp. Evangelicæ, Theophil. in Ep. ad Rom. 1., S. Aug., S. Jo. Damasc., S. Cypr., Lactant., & alii. Sed audiat S. Greg. Niss. Orat. 6. de Beatitude. *Quantus a te capi potest Divinæ contemplationis modus in te est, quippe cum is, qui te formavit, tale bonum statim tuæ naturæ, quasi inefficenteris. Tui enim fabricationi Deus suæ naturæ bonorum simulacra, & imitamenta insculpsit, veluti ceram quamdam sculpsit figura præformans. Et Arnob. lib. 1. contra Gent. circa medium: Quisquamne est hominum, qui non cum istius Principis notione diem primæ civitatis intraverit? Cui non sit ingentium, non affixum ... non impressum, non insitum esse Regem, ac Dominum cunctorum, quæcunque sunt, Moderatorem?*

nio, aliquam ideam objectivam, saltem de *existentia Dei* esse menti nostræ in ipsamet creatione insitam, atque congenitam. Quare, licet non simus solliciti de mente Cartesii circa ideas innatas; iis tamen non assentimur, qui mentem humanam creari docent instar *tabulæ* prorsus *rasæ*, cui nullos Naturæ Auctor Characteres inscripserit.

II. Ideæ formales aliæ sunt simplices, aliæ compositæ. *Simplices* dicimus, in quibus nihil de objecto affirmamus, aut negamus, quæ etiam *apprehensiones simplices* passim appellantur. Has experimur ita versari circa unum idemque realiter objectum, ut illud ad modum plurium repræsentent sub diversa ratione formali intrinseca: unde objectum denominatur Logicè, & extrinsecè distinctum *ratione ratiocinata*, nimirum, fundata in ipsamet objecti natura. Fundamentum autem huiusmodi nihil est aliud, nisi ordo, quem habet entitas illa realiter una ad plura obliqua, seu connotata diversa. Hinc nullo naturali ratiocinio probari potest necessitas admittendi inter gradus metaphysicos ejusdem individui creati distinctionem ullam sive *formulem ex natura rei*, sive *virtualem intrinsecam*, sive etiam *virtualem extrinsecam*, quam dicunt *precisionem objectivam*: siquidem ejus nomine intelligatur cognitio terminata ad unum tantum ex prædicatis realiter in objecto identificatis.

III. Sicuti autem plures ideæ simplices unum realiter objectum ad diversa obliqua referentes, illud denominant extrinsecè multiplex, & *distinctum ratione ratiocinata*; Ita idea simplex quæ plura objecta realiter distincta repræsentat ad modum unius sub ratione abstracta omnibus communi, videlicet illa plura referendo ad connotata communia, & similia, tribuit illis pluribus denominationem extrinsecam unius *unitatis rationis ratiocinatæ*. Per hanc unitatem singularibus objectis extrinsecam, & per multiplicitem realem ipsis intrinsecam haberi dicimus universale sive logicum, sive metaphysicum: Quamvis itaque habeatur in rebus ante quamlibet mentis operationem ordo ad obliqua similia, adeoque aptitudo ut plura sub una eademque idea confundantur, quæ quidem aptitudo dici potest *unitas fundamentalis*; Formalis tamen ipsa unitas ad universale requisita nonnisi per intellectum haberi potest.

IV. Ideas rerum Archetypas in Divina mente a Platone constitutas fuisse testantur S. Augustinus (1) Severinus Boetius (2) alique Platonici. Controvertitur inter Eruditos num illas Plato admiserit in eo sensu, quem illi attribuit Aristoteles: nimirum *Naturas quasdam universales, extra Deum ab æterno existentes, necessarias, improductas &c.* Accusant alii Aristotelem, quali per invidiam hunc Magistro suo errorem

ap-

(1) Lib. octogintatrium *Questionum* Quest. 46. lib. 7. de *Civit. Dei* cap. 28., & alibi.

(2) Lib. 3. de *Consol. Philos.* Deum sic alloquitur Boetius.

*Tu cuncta superbo
Ducis ab exemplo, pulchrum pulcherrimus ipse
Mundum mente gerens, similique in imagine
fermans.*

appinxerit, hostemque finxerit, quem scilicet impugnando, magnis inimicitiis claresceret; Alii vero Philosophum ab hac nota vindicant, & inter ceteros M. A. Muretus (1) & P. Dionys. Petavius (2) contententes non invidia, vel contradicendi libidine, sed solius veritatis studio, Genuinam ipsam Platonis sententiam ab Aristotele fuisse confutata. Quidquid sit de hac controversia: Dicimus Ideas istas, sive cum Divina intelligentia identificatas, sive a Deo distinctas (quas quidem hic supponimus Fidei Catholicæ repugnantes), ineptas esse ad constituendum universale sive *Metaphysicum*, & ut ajunt, *in essendo*, sive *Logicum in enunciando*.

De Differentia specifica, & Numerica.

V. **N**on repugnat duo quæpiam differre specie, quorum essentialis perfectio sit æqualis. Hinc differentia specifica non est refundenda in hanc inæqualitatem perfectionis essentialis; sed verilimilius repetitur ex essentiali duorum, aut plurium dissimilitudine, quæ sit considerabilis a Scientiis, quæ videlicet non consistat in prædicato merè individuali, aut in relatione ad terminos merè individuales: hæc enim ad progressionem scientificas est inutilis.

VI. Cum duo quæpiam differre numero intelligamus per hoc solum, quod unum non sit aliud, seu per solam realem distinctionem unius ab alio, dicimus dari posse differentiam purè numericam etiam inter ea, quæ neque constant materia physica, neque ad illam ordinantur. Hinc fatemur quidem cum S. Augustino (3) ignorari a nobis quid reipsa inter se differant Angeli, num solo numero, ut plures SS. PP. docent apud Petavium (4), an verò etiam specie; Negamus tamen repugnare inter Angelos differentiam purè numericam, spectata unice illorum Natura. Quod si D. Thomas (5) *impossibile dixit quod substantiæ separatae sint plures unius speciei*, non proinde censendus est nobis contrarius: ut enim notat Franciscus Ferrariensis in expositione hujus loci, non est intelligendus de absoluta, & Metaphysica repugnantia, quam alibi (6) expressè negat.

A 3

De

(1) Orat. 24. Volum. 2. edit. Veron. 1717.

(2) To. 1. Theolog. Dogm. lib. 4. cap. 9.

(3) Ad Otiosum contra Priscillianistas, cap.

11.

(4) Lib. 1. de Angelis cap. 14.

(5) Lib. 2. contra Gentes cap. 93.

(6) Opusc. 6. contra Averroistas, postquam ostendit substantiam quamlibet separatam esse unum numero, sic pergit: *Valde autem*

radice argumentantur ad ostendendum, quod Deus facere non possit, quod sint multi intellectus ejusdem speciei, credentes hoc includere contradictionem: Dico enim, quod non esset de natura intellectus, quod multiplicaretur, non propter hoc oporteret, quod intellectum multiplicari includeres contradictionem.

De Veritate Enunciationum.

VII. **A**ctus quilibet enunciativus, si conformis sit objecto enunciato, *verus* dicitur: *falsus* autem, si sit *difformis*. Hinc veritas ipsa formalis non consistit adequatè in solo actu, sed partim in actu, partim in objecto. Actus quilibet absolute aliquid enuncians vel est determinatè verus, vel determinatè falsus, etiamsi objectum absolute enunciatum, sit contingenter, & liberè futurum. Hinc rejicienda est Epicureorum opinio, qui teste Cicerone (1) ex duabus contradictoriis de objecto contingenter futuro neutram determinatè veram esse affirmabant. Verificativum autem formale cujuslibet enunciationis affirmativæ de futuro contingente absolute non est ullum Dei Decretum cum objecti existentia connexum; Sed est objectum ipsum ita in se futurum, ut enunciatur; Inde verò minimè sequitur propositiones hujusmodi veras esse independenter a quolibet Dei Decreto, ut constet paritate propositionum de objecto præsentè, vel præterito.

VIII. Supponimus tamquam omnino certum futuros quoslibet eventus, utcunque contingentes, & creaturis liberos esse ab ipsamet æternitate Divino intellectui omnino perspectos, & exploratos: ut enim ait S. August. (2) *Confiteri esse Deum, & negare præscium futurorum, aperissima insania est*. Æternam hanc, atque certissimam Dei Scientiam de futuris eventibus cum eorundem contingentiâ & libertate optimè conciliari sustinemus potissimum adversus Philosophos Ethnicos, qui cum utrumque simul componere nescirent, alterutrum negarunt.

De Scientia.

IX. **N**omina *Scientiæ* intelligimus cognitionem certam, & evidentem sive immediatè ex ipsis terminis, sive mediatè per discursum. Experimur sane nec omnes, nec plerasque nostras, cognitiones ejusmodi esse, quod de suis prædenter jactabant Dognatici quidam; Verumtamen cognitiones aliquas verè scientificas, non modo haberi posse sustinemus adversus Acatalepticos, verum etiam re ipsa existere apud nos, contra scepticos asserimus, & quidem de novo, ut ajunt, acqquisitas, non autem per meram reminiscen-
tiam exsuscitatas: Neque enim probari potest Platonis commentum, qui scientias omnes humanæ menti congenitas affirmabat, itaut *nihil aliud*

(1) Lib. De Fato, ubi hæc habet: *Nisi forte volumus Epicureorum opinionem sequi, qui tales enunciationes nec veras, nec falsas esse dicunt; aut cum id pudeat, illud tamen dicunt, quod est impudentius: veras esse*

se ex contrariis disjunctas; sed quæ ex his enunciata essent, eorum neutrum esse verum. Ob admirabilem licentiam, & miserabilem inscientiam differendi!

(2) Lib. 5. de Civit. Dei, cap. 9.

aliud sit discere, nisi recordari (1) Quod verò hanc ipsam opinionem adoptaverit olim (2) S. Augustinus, nihil Platoni suffragatur, cum eandem postea expresso revocaverit (3).

X. Propria, & specifica scientiæ attributa sunt certitudo, & evidentia: Opinioni autem inevidentia, & incertitudo. Si hæc tantummodo spectentur, tanta non est illorum oppositio, ut componi nequeant in eodem intellectu duo actus circa unum, idemque objectum materiale versantes, quorum alter sit scientificus, alter opinativus.

XI. Universalis illa, & seria (4) Dubitatio de omnibus, ne ipsis quidem exceptis primis principiis (5), qualem videtur præscribere, Cartesius veritatem inquirenti, ut scilicet falsa instantiæ præjudicia mens exuat, viamque sibi tutissimam ad inconcussam veri notitiam aperiat, etiam si fingatur obtineri revera posse, I. quidem fatalis est Religioni, utpote quæ ad ipsammet Dei existentiam (6) extenditur II. verò e diametro adversatur fini, propter quem præcipitur. Siquidem omnem ad scientias aditum præcludit: Intellectui enim, qui semel in hoc se barathrum conjecerit nulla uspian suppetit ad quaesitam veritatem evadendi via. Ludere autem videtur Cartesius in re seria, dum proponit (7) dubitanti de omnibus suum illud: *Cogito ergo sum*, Ariadnæum scilicet filum, quo extricari facile possit ex illo universalissimæ dubitationis veluti labyrintho; Quasi verò minus repugnet *idem simul esse, & non esse*, quam *cogitantem, dum cogitat, non existere*: Adeoque intellectus verè dubitans de illo primo Principio, immo illud, cæteraque similia pro falsis habens, manensque *obstinatè*, ut ipse jubet, (8) *in hac meditatione defixus*, dubitare perinde non possit de suamet cogitatione, atque existentia.

A 4

EX

(1) Cicero *Quæst. 1. Tusc.*

(2) Lib. De *Quantit. Animæ* cap. 20. *Videsur omnes artes secum Anima attulisse, nec aliud esse quod dicitur discere, quam reminisci, & recordari.*

(3) Lib. 1. *Retract. Dixi, quod in disciplinis liberalibus eruditi sine dubio in se illas oblivione obrutas eruant discendo, & quodam modo refodiunt; sed hoc improbo: Credibilis est enim, propterea vera respondere de quibusdam disciplinis etiam imperitis eorum, quia præsens est eis lumen rationis æternæ, ubi hæc inmutabilia vera conspiciunt; non quia ea noverant aliquando, & obliti sunt, quod Platoni, & talibus visum.*

(4) Initio primæ Meditationis: *Cogor sciteri nihil esse ex iis, quæ olim vera putabam, de quibus non licet dubitare, idque non per inconsiderantiam, vel levitatem, sed propter validas, & meditata rationes; Idcirco et-*

iam ab iisdem non minus, quàm ab operis falsis, accurate deinceps assensionem esse cohibendum, si quid certi velim invenire.

(5) 1. par. Princ. num. 5. *Dubitabimus etiam de reliquis, quæ antea pro maximè certis habuimus, etiam de Mathematicis demonstrationibus, etiam de iis Principiis, quæ hactenus putavimus esse per se nota.*

(6) 1. par. Princ. num. 7. *Rejicientes illa omnia, de quibus aliquo modo possumus dubitare, ac etiam falsa esse fingentes, facile quidem supponimus nullum esse Deum. Et Medit. 1. prope finem; Supponam igitur non optimum Deum fontem veritatis, sed genium aliquem malignum, eundemque summe potentem, & callidum omnem suum industriam in eo posuisse, ut me falleret &c.*

(7) 1. par. Princ. num. 7.

(8) Sub finem primæ Medit.

E X P H Y S I C A

De Corpore generatim.

XII. **C**orpora existere non demonstramus, sed certum physicè supponimus ex vivo atque constante omnium sensuum testimonio, quidquid demum sit vel de ratiocinio Cartesii

(1) quo corporum existentiam demonstrare contendit, vel etiam de ipsa demonstrabilitate, quam negat Nicolaus Mallebranchius (2). Ad Corporis Essentiam quod attinet, perperam illa constituitur a Cartesio (3) & affectis in trina Geometrica dimensione: Nam præterquam quod eadem convenit loco vacuo (cujus absolutam repugnantiam probare non possunt absque petitione principii) ex absurdis confectariis doctrina, isthæc falsa convincitur: Ex ea enim sequitur I. Nulla posse a Deo creari nova corpora, nulla destrui. II. Mundum nullis terminis circumscribi, (4) adeoque infinitum esse, vel ut Cartesius mavult, *indefinitum*. III. Nec augeri, nec minui, nec mutari extensionem posse, quin augeatur, minuat, mutetur corpus, (5) quod quidem ultimum confectarium. Doctrinæ Catholicæ de Sanctissimo Eucharistico Mysterio adversatur, ut præ cæteris animadvertit Huotius. (6). Celebris, porro S. Augustini locus, (7) *Spatia locorum tolle corporibus, & nusquam erunt, & quia nusquam erunt, nec erunt*, (quo Calvinus (8) abutitur contra Dogma Catholicum de reali præsentia Corporis Christi in Eucharistia), non evincit S. Doctorem circa essentiam corporis Cartesio consentire: Siquidem expresse docuit extensionem, & magnitudinem a corpore distingui (9): solum itaque significat extensionem esse affectionem naturæ viribus a cor-

(1) Par. 2. Princip. num. 1.

(2) De la Recherche de la vérité livr. 1.

(3) 1. par. Princ. num. 53. *Nempe extensio in longum, latum, & profundum substantiæ a corpore naturam constituit. Et 2. par. Princ. num. 4. Percipiemus naturam materiæ, sive corporis in universum spectari non consistere in eo, quod sit res dura vel ponderosa. ... Sed tantum in eo, quod sit res extensa in longum &c.* Idipsum autem docent Jacob. Rohault Phys. 1. par. cap. 7. num. 9. Antonius le Grand Instit. Phil. par. 4. ar. 3. num. 2.

(4) Ita Cartesius 2. par. Princ. num. 21., & clarius ep. 69. ad Henricum Maurum, ubi ait: *Puto implicare contradictionem ut mundus sit finitus, vel terminatus, quia non possum non concipere spatium ultra quoslibet præsuppositos mundi fines: Tale autem spatium apud me est verum corpus.*

(5) Cartes. 2. par. Princ. num. 8. *In re autem fieri non potest, ut vel minimum quid ex ista quantitate, aut extensione tollatur, quin tantumdem etiam de substantia detrahatur; nec vice versa ut tantillum de substantia detrahatur, quin tantumdem de quantitate, aut extensione tollatur.* Idipsum profertur Antonius le Grand ibidem, & Rohault cap. 8. num. 5.

(6) Petrus Daniel Huet Episc. Abrincens. in Cens. Philos. Cartes. ait: *Augustissimum Eucharistiæ Sacramentum doctrina ista funditus laesum.*

(7) Ep. 107. al. 57. ad Dardanum.

(8) Ap. Bellarm. lib. 3. Contr.

(9) Lib. 5. de Trin. cap. 10. *In his ergo rebus aliud est magnitudo, aliud quod ab ea magnitudine magnum est: & prorsus non est hoc magnitudo, quod est magna domus.*

a corpore inseparabilem, quod satis erat ad ejus intentum, ad discrimi-
nandum videlicet corpus a spiritu, ut evinceret Animam rationalem hu-
jus affectionis expertem, non corpus esse, sed spiritum.

XIII. Definitionem corporis ad omnes Dialecticæ leges prorsus ex-
actam non quarimus: in re siquidem abstracta, & perdifficili satis, super-
que esse potest descriptio, quæ ita naturam corporis adæquet, ut *omni,
soli, & semper conveniat*. Quia tamen ab optimo quamminimum: rece-
dendum est, etiam ubi optimum desperatur, eam dicimus, ex pluribus,
quæ circumferuntur descriptionibus, præferendam esse ceteris, quæ mi-
nus absit ab optima: Talem autem esse putamus, quæ assumat pro attributo
differentiali primario *Radicalem*, ut ajunt, & *exiguitatem impenetra-
bilitatem*.

XIV. Quamvis convenient Philosophi cujuslibet sectæ circa intrin-
seca principia corporis abstractè, & metaphysicè considerata, statuentes
corpora omnia constare ex materia, & forma, quatenus mente saltem di-
stinguunt in quolibet corpore aliquid secundum se prorsus iners, indis-
ferens, & determinabile, quod *Materiam* dicunt, & aliquid, unde mate-
ria ipsa determinatur ad certam aliquam sensibilitatem, quod *Forme* no-
mine intelligunt; Nihilominus in Physica utriusque principii natura ex-
plicanda tam mire dissentiant, ut vel ex hoc uno impletum intelligatur
Divinum illud Oraculum: (1) *Mundum tradidit disputationi eorum, ut
non invenias homo opus, quod operatus est Deus ab initio usque ad finem*.
Hinc varia illa, atque inter se pugnancia, in quæ Philosophi divisi sunt,
Systemata, incerta sunt, suisque singula difficultatibus adnoxia; Verum
quæ Recentiores vel nova excogitarunt, vel vetera expolierunt, quam-
quam & ingeniosa sunt, & plura continent explicandis Naturæ phæno-
menis perutilia; qua tamen parte vires activas a materia realiter distin-
ctas negant, omnemque creatis entibus propriam efficientiam adimunt,
Peripatetico Systemati anteponenda non esse, in sequentibus per singu-
las partes ostendemus.

De vi activa tum Accidentali, tum Substantiali.

XV. **N**omine *vis activa* intelligimus Energiam ad determinandam
physicam aliquam indifferentiam saltem ad motum. Hinc
quàm evidens est motum existere tam evidens est existere
vim activam, seu rationem proximam, & immediatam ipsius motus: nihil
enim esse potest absque ratione cur sit. (2) Quicumque autem repugnare
contendunt creatis entibus vim activam ex eo titulo, quod iisdem repugnet

A 5

vis

(1) Eccl. cap. 3. v. 11.

(2) Cic. Acad. 2. *Nihil est turpius Physico*

quam sine causa fieri aliquid dicere.

vis conservativa, perperam in unum confundunt duas vires longè diverfas: Sicut enim non idem est movere corpus, & conservare illud in spatiis successivè diverfis, ita neque vis movendi corpus eadem est, ac conservandi. Asserimus itaque non repugnare vim activam creatam corporibus intrinsicam; Quinimmo ex ipsa, quam constanter experimur nostrorum sensuum affectione suaderi contendimus aliquas reapse vires hujusmodi corporibus inesse, quod quidem ratiocinium innuitur a D. Thoma (1), qui propterea stultam vocat quorundam opinionem, qui nullam in creatis energiam & activitatem agnoscentes, Cartesianæ huic sententiæ proludebant. Quantum porrò absit nostra hæc sententiæ ab illo Ethnicorum errore, qui Naturæ omnia tribuentes, Providentiam negabant, & per se patet, & ex eo etiam deducitur, quod Sancti Patres, (2) qui acerrime impugnaverunt impium illud *Naturæ* commentum, illudque a Christiana Philosophia, præcul ablegare, totis viribus conati sunt, iidem sententiam nostram expressè doceant.

XVI. Vires accidentales, seu *qualitates* corporum illas dicimus, quæ substantiam corporum, quibus insunt, non constituunt, adeoque abesse possunt a corpore, integra permanente illius substantia. Aliquas hujusmodi vires accidentales admittendas esse contendimus, easque esse veras qualitates physicas absolutas, videlicet realiter a materia, & qualibet materie modificatione distinctas, quæ quamvis naturæ viribus existerent, nequeant separari a substantia, ad cujus proximam sensibilitatem pertinent; possunt tamen divipiti, asserimus efficaciter deduci ex perpetua, & constante Catholice Ecclesiæ Doctrina: Siquidem quæ, de sensibilitate panis, & vini post Consecrationem remanente in Mysterio Eucharistico, habentur apud Concilia (3), & Patres, (4) & in commu-

(1) In secundum Sent. Dist. 4., quest. 1. Art. 4. *Hæc positio stulta est, quia ordinem tollit universi, & propriam operationem a rebus, ac destruit iudicium sensus.*

(2) Ap. Petav. De Incarn. lib. 8. cap. 1. ubi referuntur inter alios S. Maximus, S. Jo. Damasc. & S. Anast. Sinaita, cujus hæc sunt verba: *Est Energia, auctore S. Gregorio Nysseno, naturalis cujusque substantiæ virtus, & motus, quo id solum caret, quod non est.* Consentit S. Basil. ep. 80. *Propter naturarum diversitatem diversæ sunt, & quæ ab illis sunt operationes.* Sed omnium differtissime S. Augustinus tunc lib. 6. de Gen. ad lit. cap. 15. & 17. tum lib. 21. de Civit. Dei cap. 7., tum lib. 3. de lib. Arb. cap. 1. & alibi.

(3) Constantiensis sub Mart. V. sess. 8. damnat 45. Wiclefi articulos, quorum secundus sic habebat. *Accidentia panis non ma-*

nent sine subjecto in eadem Sacramento.

Tridentinum Sess. 13. Can. 2. *Si quis dixerit in Sacramento Eucharistiæ Sacramentum remanere substantiam panis, & vini, una cum Corpore, & Sanguine D. N. Jesu Christi, negaveritque mirabilem illum, & singularem conversionem totius substantiæ panis in Corpus, & totius substantiæ vini in Sanguinem, manentibus dumtaxat speciebus panis, & vini ... Anathema sit.*

Et Can. 3. *Si quis negaverit in ipso Sacramento Eucharistiæ sub unaquaque specie, & sub singulis cujusvis speciei partibus, separatione facta totum Christum contineri, Anathema sit.*

(4) Sancti Patres sæpe asserunt Species Eucharisticas esse quid permanentes, esse Sacramentaliter unitas Corpori Christi, esse mundificabiles, frangibiles, corruptibiles, & denique fuisse prius inabuentes poni: Ita

nibus loquendi formulis ab Ecclesia usurpantur, ea sunt, quæ proprie intelligi nequeant, nisi de accidentibus absolutis. Hinc hypothelimi specierum intentionalium, quas vel Deus immediate per seipsum causat in sensibus nostris, vel Christi Corpus efficiat objective, attenuatum, scilicet sensibilitati panis, & vini, admiramur ut ingeniosam, sed non admittimus: Aliud enim est potuisse hoc Mysterium sic institui: aliud autem sic se ipsa fuisse institutum.

XVII. Cum vero hujusmodi vires accidentales constanter inesse deprehendantur corporibus, quamdiu sunt in statu suo naturali, & quidem eadem in iisdem, in similibus similes, diversæ in diversis: Hinc fit, ut idem ratiocinium, quo probatur inesse corporibus vis activa, evincat in iisdem aliquam vim substantialem, quæ sit ratio cur certæ vires iisdem stabiliter inhæreant: Si enim liceat Physico rationem hujusmodi in merum Dei placitum extrinsecum refundere, sublata qualibet exigentia naturali, & congruentia, cur non liceat sublata qualibet a corporibus vi, & activitate, motus omnes naturales a Deo immediate agente unice repetere, & Physicam universam, (qua parte Æthiologica est, & naturalium effectuum causas inquiri,) e medio tollere?

XVIII. Admissa itaque semel vi activa incoherenter negatur corporibus vis quædam substantialis, quæ sit prima ratio, & veluti radix omnium virium, & sensibilitatum, quas constanter experimur, & ex quarum complexione diversa, corporum diversitatem substantialem determinamus. Hanc vim substantialem intelligimus nomine *formæ substantialis*, eamque putamus probabilius asseri distinctam realiter a materia, etiam in non viventibus, saltem quoad particulas illorum primigenias, & elementares: non enim incipiamur corpora qualibet sub sensum cadentia constare posse ex minimis elementaribus particulis heterogeneis certa figura, mole, & activitate præditis, ex quarum varia temperatione, atque textura, diversa ipsa mixtorum non viventium sensibilitas efflorescat. Verum, cum hæc in pluribus constans omnino sit, & stabilis, reliquum erit, ut hujusce stabilitatis ratio in ipsismet primordialium elementorum naturas refundatur.

A 6

De

expressio S. Ansel. Cantuar. lib. de Corp. Domini. S. Hirenus (Flor. Sæc. 2.) lib. 4. cap. 3. ait: *Eucharistia est ex duabus rebus constans, terrena, & celesti*. S. Cypri. (Sæc. 3.) censetur auctor Sermōnis in Cœna Domini, ubi legitur: *Eucharistiam corporalis substantie retinere speciem: Divinam Essentiam infundere se Sacramento visibili*. S. Hilar. Picet. (Sæc. 4.) ut refer-

tur Cap. 78. de Consecr. dist. 2. ait: *Non est omnino quantitas visibilis in hoc estimanda Mysterio*. Vid. Rayn. sect. 1. Opusculi cui titulus, *Examine panis, & vini*, ubi eruditè ostendit idem significatum fuisse a primis Ecclesie temporibus nomine *Signi, velamenti, characteris &c.*, quod nunc significatur nomine *accidentis*.

De Loco, & Motu.

XIX. **P**artem spatii *locum* dicimus: Spatium autem concipere solemus per relationem ad corpus sub idea capacitatis continendi corpora trine dimensa: Sic distantiam inter duo puncta *spatium longum* dicimus: inter duas lineas, *spatium latum*: inter duas demum superficies, *spatium profundum*, sive altum: Quantitatem ergo spatii ex quantitate corporis ibi locati, vel locabilis determinamus: Quare spatium generatim consideratum videtur definiri sic posse: *Relatio distantiae inter puncta, lineas, & superficies*. Duplex distingui solet spatium, *reale* videlicet, & *imaginarium*. Reale spatium est relatio distantiae inter puncta, lineas, & superficies corporum reipsa existentium. Hoc Recentiores passim vocant *relativum*, & *mobile*: Relativum quidem, quia est ipsamet relatio distantiae inter corpora: Mobile autem, quia cum moveri possint corpora, mutabilis etiam est inter illa, per accessum, vel recessum, mutua relatio distantiae. Spatium imaginarium appellamus relationem distantiae inter puncta, lineas, & superficies corporum possibilium: Cum autem praeter creata corpora, alia insuper, atque alia in infinitum creari possint, proinde spatium hoc nullis limitibus circumscribi, & in immensum quaquaversum protendi concipimus ultra quoslibet Mundi fines.

XX. Imaginarium hoc spatium a Recentioribus dicitur *absolutum*, & *immobile*. Absolutum quidem, quia quamvis per relationem ad corpora concipiatur, imaginamur tamen illud existens etiam nullo existente corpore; Immobile verò, quia fixos imaginamur distantiarum limites inter corpora possible; Nimirum ad concipiendum spatium cogitamus corpora cum talibus inter se distantis; Dein removeamus ipsa corpora a quibus species mutuati sumus ad spatium concipiendum; & adhuc intelligimus puncta, lineas, & superficies cum iisdem inter se distantiae respectibus quodammodo permanentibus. Porro sicuti spatium, ita & locus dupliciter accipitur. Pars spatii relativi, & mobilis *locus relativus* dicitur: *locus* autem *absolutus* vocatur pars spatii absoluti, & immobilis. Quare, cum nomine motus localis intelligatur transitus rei de loco in locum, seu *successiva & continuata loci mutatio*, hinc motus etiam dupliciter accipitur, *absolutus*, & *relativus*. Primus, qui solus, proprie loquendo, motus est, est mutatio loci absoluti; alter vero est mutatio loci relativi, quæ per solum etiam corporum circumjacentium motum haberi potest. Non desunt Philosophi qui hunc ipsum motum relativum dividant in *relative proprium*, & *relative communem* (1). Relative proprium dicunt successivam applicationem corporis ad diversas partes corporum immediate circumambientium. Relative communem appellant motum corporis, quod

(1) Ap. Pet. Van-Musschenbr. Elem. Physf. cap. 4.

quod simul cum aliis, quorum respectu eundem situm servat, mutat communem locum relativum. Idem cum proportionem sentiunt de quiete, quæ diversa est pro diversitate motus, cui opponitur, & a quo nomen accipit. Atque hæc quidem de loco & motu hætenus dicta proponimus tamquam meras vocum explicationes, de quibus non disputamus.

De Vacuo.

XXI. **L**ocus, ubi nulla sint corpora, vacuum dicitur. Absolutam vacui cujuslibet, utcumque minimi repugnantiam gratis affirmant Cartesiani, tamquam consecrarium doctrinæ suæ de corporis essentia: neque enim probare possunt nisi per circulum, spatium vacuum fore verum corpus, adeoque contradictionem involvere. An verò existat re ipsa spatium corporibus interceptum omnino expers corporis, non definimus. Illud solum dicimus, physicam vacui, sive coacervati, sive etiam disseminati necessitatem non demonstrari; Siquidem & motus localis, (1) & rarefactio, ac condensatio, & inæqualis specifica gravitas, (2) & reliqua Naturæ Phœnomena, etiam secluso vacuo possunt explicari, admissa existentia fluidi subtilissimi poros mixtorum corporum liberè permeantis, cujus exilissimæ particule sint maximè molles, & qualibet superficie terminabiles: Nam & mixta omnia sub sensum cadentia, porosa esse, post illustratam experimentis physicam in confesso est apud omnes, (3) ~~nee demonstrari potest insensibile illud fluidum non existere,~~ cui nullum sit corpus impervium, præsertim cum experiamur insinuari lucem per crystallum & gemmas, quarum cæteroqui pori nullius ope microscopii adhuc detegi potuerunt, ut testatur Musschenbroek. (4) Hinc facile etiam solvuntur argumenta pro vacuo ab experimentis petita, sive illius, quod vocant vacuum artificiale, in recipiente Boyliano, & in tubis Torricellianis: sive salium diversæ generis, (5) qui in cyathum aqua plenum successive immissi, volumen aquæ non augent: sive duorum planorum, quæ a mutuo contactu motu parallelo subito divellantur (6). De-

mun

(1) Argumentum Epicureis familiare a motu corporum petitur insinuat Lucretius Carus lib. 1. de rerum natura:

Quapropter locus est intus inane, vacansque.

Quod si non esset: nullo ratione moveri

Res possent: Namque officit, quod corporis esset Officere, ac obflare, id in omni tempore adesset Omnibus. Haud igitur quicquam procedere possit.

Principium quoniam cedendi nulla daret res.

(2) Isaacus Newton Philos. Natur. lib. III. Propos. 7. ex gravitate corporum specifica probat vacui corporibus interspersi necessitatem, contendens ex hydrostaticæ legi-

bus fore, ut nullum corpus firmum in aere libero descenderet, si omnia plena essent. Ut hoc argumentum rem conficiat, duo supponi debent, nimirum Gravitatem esse attributum universale materię & esse materię proportionalem, quorum neutrum nobis est compertum.

(3) Vid. Musschenbr. in Elem. Phys. §. 41.

(4) Elem. Phys. §. 845.

(5) Experimentum Gassendi Phys. sect. 1. lib. 2. cap. 3. pag. 195. Edit. Lugdun. an. 1658.

(6) Aliud Lucretii argumentum lib. 1. *Postremò duo de concursu corpora lato*

num neque Newton, ex motu caelestium corporum (1), neque Muschenbroek (2) ex luce a stellis fixis ad nos usque propagata satis evincunt necessitatem vacui caelestis conservati:

De Impenetrabilitate formali.

XXII. **I**mpenetrabilitatis nomine intelligimus vim illam, quæ est immediata, & proxima ratio, cur corpora, saltem secundum particulas primigenias, & elementares, certam & determinatam spatii quantitatem, qualitatemque constanter occupent, excludantque a loco, in quo sunt, quodlibet aliud corpus, seu penetrationi resistent. Hæc vis, in cujus exigentia consistere diximus essentiam corporis, *impenetrabilitas formalis*, vel etiam *quantitas* appellatur (3): Eaque probabiliter est prima & præcipua corporis qualitas, in qua reliquæ vires accidentales recipiuntur, & ad quam essentialiter referuntur sensibiles uniuscujusque corporis modificationes, siue accidentia relativa, ut figura, moles, seu volumen, situs &c. utpote quæ quantitatem ipsam formalem præsupponunt.

De Gravitate.

XXIII. **O**bservantur corpora sublimaria sibi relicta deorsum ferri ad unum sensibilibiter centrum terræ per lineam horizonti perpendiculari, & quamdiu sustinentur, nisi quemdam, qui *gravitatio* & *pondus* dicitur, exercere secundum eandem directionem. Causam hujus Phænomeni *Gravitatem* appellamus. Hæc refundenda non est in vim centrifugam materiæ caelestis, ut statuit Cartesius: (4) Nam, (ut omittamus fictitium esse commentum cui nititur, quinimmo pugnans cum iis, quæ docet in tractatu de luce, ut ostendit P. Daniell (5)) seque-

Si cetera dissiliant: nempe aer omne necesse est, Inter corpora quod fiat, possidas iuvare.

Ita porro, quomodo circum celerantibus auris Constat, baud poterit tamen uno tempore totum Completi spaciæ &c.

(1) Post lib. III. Optic. Quæst. 20. pag. 313. Edit. Londin. an. 1706. *Quo itaque locus sit diuturnis, & regularibus Planetarum, Comætarumque motibus, omnino necesse est, ut spatia caelestia omni materia sint vacua; Nisi forte excipiendi erunt tenuissimi aliqui vapores, exhalationes, vel effluvia, quæ oriuntur ex atmospheris Terræ, Planetarum, & Comætarum.*

(2) Elem. Phys. Cap. 27. §. 847. *Quoniam in hac immensa distantia Stellæ lucæ vividissima micant, eris radiorum robur non,*

vel parum imminutum: quod nisi per spatium caeleste vacuum, & nullo modo resistens, lucemne reflectens, aut inereplem, radii transivissent, concipi nequit.

Superiore autem §. docuerat, ex calculo Bradleyi observationibus innixo, tantam esse fixarum distantiam, ut tam percurrere non possit globus e tormento bellico explosus rapidissima, & æquabili celeritate, nisi annis 104, 146, 666, 636

(3) *Soliditatem* appellare malunt aliqui Recentiores, ut Keill Introduct. ad veram. Phys. lect. 2. Non laboramus de vocibus, modo in re convenientibus.

(4) Par. 4. Princ. num. 23. & seq.

(5) In epist. adjecta operi, cui titulus: *ster per Mundum Curt.*

queretur gravitas magnitudinem superficierum potius, quam massam, contra quam experimur; Nec unicus vortex ab Occidente in Orientem omnia corpora dirigeret ad unum terræ centrum, sed ad diversa axis puncta, a quibus recedendo exercetur vis centrifuga per circulos Aequatori parallelos; Qui vero duos vortices commenti sunt, sese interfecantes ad angulos rectos, nisi velint vorticibus, eorumque partibus provincias dare quæ celerius, quæ tardius moveantur, non satis occurrunt huic incommodo.

XXIV. Neque foelicior videtur hypothesis Gassendi Telluris magnetisimum mechanicè explicantis per aduncam & facile complicabilem figuram terrestris effluvii: Nam & in recipiente exhausto descensus gravium celerior est, cum tamen ibi vel nulli sint, vel multo pauciores hamuli; Et ad arbitrium confingitur in effluvio terrestri vis ista voluti venatica, quæ determinentur atomi ad oppositam directionem ut captam prædam secum abripiant; Et demum reddenda adhuc superest ratio hujus descensus atomorum, in quem videlicet quæstio transfertur: siquidem ut corpus irretitum atomi deorsum trahant, descendere debent.

XXV. Transferunt pariter quæstionem hanc, non solvunt qui descensum gravium explicandum putant vel per diversam specificam levitatem juxta hypothesim Torricellii (1) de positiva omnium corporum levitate: vel per solam absolutam levitatem incogniti alicujus fluidi, ut opinatur Fortunæ a Brixia: (2) vel per pressionem fluidi aut materiæ cujuslibet ætheris superincumbentis, ut placuit Varignonio, & Du Hamel (3). Quare dicendum videtur Gravitatem esse vim corporibus ingentitam, sed ab illis distinctam, & Divinitus separabilem, quæ pro diversa corporum natura diversa sit, & inæqualis; sed in iisdem, quamdiu sunt in statu naturali, semper eadem sit, & constans, semperque agit uniformiter, producendo æqualibus temporibus æquales gradus impetus: siquidem, ut ex Galilæo demonstrant Samuel Clarke, (4) Musschenbroek, (5) aliique passim, velocitates acquisitæ a gravibus descendantibus se habent, ut tempora.

XXVI. Lex accelerationis motus in gravibus liberè descendantibus, ab eximio Galilæo primum observata, & plurimis experimentis subinde confirmata a PP. Ricciolio, (6) & Grimaldo (7) & a præcipuis Europæ Academicis, ea est, ut spatia percurta æqualibus temporibus successive crescant secundum seriem numerorum imparium ab unitate: nimirum 1, 3, 5, 7; &c. Dummodo tamen nulla ratio habeatur medii resistantis: Ubi enim grave descendens vincere debeat resistantiam medii, quæ in progressu semper sit major, acceleratio ista suum tandem habebit ter-

mi-

(1) Lezioni Acad. lez. 6. della Leggerezza.

(2) To. 1. Phys. Dissert. 6.

(3) To. 4. Tract. 2. Cap. 2. Phil. Burg.

(4) Adnot. ad Phys. Rohault. par. 2. Cap. 28.

(5) Elem. Phys. §. 136, 137.

(6) Almag. Par. 1.

(7) Phys. Par. 2.

minum, & motus post notabile aliquod tempus fiet æquabilis. Verum, cum altitudines, ex quibus experimenta capere licet, tantæ non sint, ut quo tempore percurruntur, augmentum resistentiæ in medio sit notabile: Hinc eam legem gravia in aere libero descendentia fervare videntur, ita ut spatia omnia dato tempore a Gravi decursa sint ut quadrata sive temporum, sive velocitatum iisdem temporibus acquisitarum. Hujus porro motus hac ratione accelerati causam refundimus in actionem gravitatis, quæ singulis instantibus novum producit impetus gradum, & jam productum conservat.

De vi Inertiæ.

XXVII. **P**assiva materiæ indifferentia ad quamlibet modificationem, *Inertia* congrue appellatur; Verum hæc nullam in sua idea vim importat, meramque denotat aptitudinem ad subeundas affectiones varias, mutationesque pro varia causarum agentium indole, & exigentia. Præter hanc indifferentiam observatur in corporibus vis quædam passiva, ex qua nimirum nullus motus, nullaque ad motum tendentia resultat, sed tota exercetur in renixa; quo corpus quodlibet, quantum in se est, cuilibet vi externæ corporeæ mutationem status inducere conanti resistit. Hanc, *vim inertie* appellat Newton, (1) eamque asserit materiæ insitam, & proportionalem. Vim inertie passivam ultro admittimus, dummodo sub hoc uno nomine non confundantur aliæ vires activæ sive ingenitæ, ut gravitas, sive impressæ, ut impetus: ex his enim augetur plurimum resistentia corporis adversus oppositos externorum agentium impulsus nitentis, quæ proinde resistentia in solam inertie vim refundi non potest.

De Vi motrice Projectorum.

XXVIII. **R**atio proxima & immediata continuationis motus in Projectis etiam a projiciente separatis refundi non potest in recursum medii fluidi, utcumque elastici: Siquidem tum ratio, tum experimenta evincunt momentum quo fluidum a fronte resistit vel majus esse, vel saltem æquale momento impulsus ejusdem fluidi a tergo conniventis; Quod si dicamus cum Epicureis in actu ipso projectionis a projiciente in projectum transmitti atomos, quarum vi corpus ad destinatum terminum transferatur, de hac ipsa vi atomorum redibit quæstio, quam si ponant ipsis atomis identificatam, cum tam varii sint, atque oppositi projectorum motus, oportebit diversam & oppositam in atomis comminisci, quod quidem est, ut ait Cicero (2) *quasi provincias atomis dare, quæ recta, quæ oblique ferantur*. Sunt qui

cum

(1) Philof. Nat. Princ. Math. lib. 1. defin. 3. (2) Lib. 1. De Finibus.

cum Cabro, (1) & Gassendo (2) nihil aliud admittant impressum mobili, quam motum ad certum spatium continuandum; sed hoc est nihil dicere; Siquidem motus non est modificatio permanens, & semper eadem, sed successiva & fluxa, quæ proinde jugiter mutatur, adeoque causam jugiter agentem requirit: actio enim physica & realis, ut est continuatio translatio mobilis non nisi a Physica & reali causa proficiscitur, quæ ibi sit, eoque tempore, quo est actio. Nihil pariter dicunt, qui rationem quæsitam refundunt in legem Naturæ: Si enim hoc nomine intelligant, ut solet, Constantiam Phœnomeni, (3) reddunt pro causa rei rem ipsam; siquidem ipsa continuatio mobilis in motu quamdiu vis absit extrinseca, est Naturæ lex, cujus immediatam, & proximam causam inquirimus.

XXIX. Neque iis assentiri possumus, qui a sola inertie vi ingenerata repetunt continuationem motus in projectis: Continuatio enim motus est actio continuata, quæ causam activam requirit, cujusmodi non est vis inertie in sensu Newtoni (4). Qui vero nomine vis inertie intelligi volunt vim activam sub quantitate indefinita corporibus ingentem, quæ secundum se sit indifferens ad quamlibet directionem, & velocitatem, sed ab impulsu, & impactione corporum ad hanc præ illa determinetur: I. quidem, ut notat etiam Musschenbr: (5) meram assumunt hypothesim, eamque repugnantem inductioni, quam de aliis viribus activis habemus, v. c. de Gravitate, vi attractionis, Elaterio &c. quæ solam remotionem impediendi ad agendum requirunt, sui que indicium præbent etiam dum impediuntur. II. uni, eidemque causæ necessariæ tribuunt diversos, & oppositos effectus, quod est deductionem physicam ab effectibus ad causas labefactare: & perinde licebit motus quoslibet gravitatis, attractionis &c. in unicam huiusmodi vim referre. III. de ista determinatione accidentali ab extrinseco adveniente, quam pro mera conditione haberi volunt, ita demum loqui debent, uti loquimur de impetu impresso: unde tota controversia tandem desinet in litem de voce. Dicimus itaque rationem immediatam cur projecta moveri pergant esse impetum, seu vim activam ipsis a projiciente impressam in actu projectionis, in ipsis

(1) Lib. 1. Meteor. tex. 17. quæst. 2.

(2) Tom. 1. Sect. 1. lib. 5. cap. 4. hæc habet poetice magis, quam verè & Philosophicè dicta: *Nimirum quæ motio in mobili est, donec moventi aliquo usque comitanti conjunctum manet, est quoddam quasi tyrocinium, quo mobile quasi addiscit captam cum movente viam pergere sursum, deorsum, transversum, obliquè, in orbem, segniter, perniciter quare & necesse minime videtur requirere vim, quæ sit a projiciente impressa, & qua fiat motus &c.*

(3) Musschen. Cap. 1. Elem. Phys. §. 7. *Leges vocamus constantes apparentes, quæ*

quoscunque corpora in similibus ponuntur occasionibus, semper eodem se habent modo.

(4) Optic. pag. 34. 1. Edit. Londin. an. 1706. *Vis inertie est principium passivum, quo corpora in motu suo vel quiete persistant, recipiunt motum vi moventi semper proportionem respondentem, & resistunt tantum, quantum sibi resistitur. Ab hoc solo principio nullus unquam in rerum universitate oriri potuisset motus. Alio aliquo principio omnino opus erat ad movenda corpora; Et jam, cum moventur, alio itidem principio opus est ad motum ipsorum conservandum.*

(5) Elem. Phys. §. 111.

sis quidem intrinsece receptam, sed utpote adventitiam, & accidentalem, realiter ab iisdem distinctam. Probabile autem est vim istam activam sub diversis quantitativis transfundi a projecto in corpora, quæ, dum progreditur, loco movet: experimur enim in occurribus corporum tantum virium alteri perire, quantum recipitur ab altero. Hinc redditur ratio cur projectorum motus in medio resistente minuat paulatim, ac tandem desinat.

De vi Efficiente.

XXX. **N**omine vis efficientis, prout contradistinguitur a vi quomodocunque activa, intelligimus vim exercendi fecunditatem cum prioritate naturæ in entitatem realiter distinctam, seu vim, quæ per suam physicam existentiam sit ratio cur existat novum aliquod verum ens physicum, & absolutum, non autem mere modale, & relativum. Aliquam hujusmodi vim inesse corporibus etiam inanimis, ex eo colligimus, quod novus impetus sive acquisitus in in gravibus, sive projectis impressus sit verum ens physicum, & absolutum, quod proinde ad existendum indiget causa physica vere & proprie effectiva, cujus actio, utpote pendens essentialiter a subiecto præsupposito, creativa non est, ~~nee arguit in causa~~ illimitatam perfectionem. Hinc notissima illa divisio causæ in *Efficientem, Materialem, Formalem, & Finalem*, rejicienda non est eo nomine, quod vel nulla sit, vel etiam repugnet creatis entibus propria efficientia.

De Brutis, & Plantis.

XXXI. **U**niversalis illa persuasio, ac veluti Naturæ anticipatio, (1) quam de vita & sensu Brutorum habemus, quæque se prodit maxime tum in affectu commiserationis, quem erga bruta experimur, tum in recepto apud omnes Nationes loquendi modo, (2) gratis revocatur ad falsa infantia præjudicia, cum & expressa scripturæ testimonia, (3) quibus passim adstipulantur Sancti Patres,

(1) Hujus anticipationis vi abreptus videtur Antonius le Grand Cartesianus, qui postquam omnem, ut ajunt, lapidem movit in proluxa dissertatione, ut sensum brutis adimeret, suarum deinde partium immemor, par. 10. Instit. Phil. artic. 4. num. 4. & 5. ita in Epicureos invehitur: *Sed nulli summi boni nomine magis abutuntur, quam is, qui illud in voluptate ponunt, & penes sensuum delectationem metiuntur... Sed sales facile erroris convincuntur, si attendant se pecoribus æquiparare, & nibilo præ-*

stantiorem illi sortem contigisse, quam quæ porci, & ovibus assignatur. Ubi manifestè supponit in brutis sensum voluptatis.

(2) Com. Laur. Magalotti (*Lettere scientifiche lett. xi.*) refert ex testimonio P. Petri Benedetti Maronitz linguarum Orientalium peritissimi, plura vocabula vitam, animam &c. apud politiores nationes significantia, vel indiscriminatim usurpari de hominibus, & brutis, vel cum solo discrimine inflexionis.

(3) Genes. 1. Bis tribuitur brutis anima vivens,

tres, (1) & ipsamet ratio physica satis revincant Cartesianos contrariae sententiae patronos. Principium autem vitae & sensus in brutis neque rationale est, neque vere & proprie spirituale, neque est ulla materia, quantumcunque attenuata, & quocunque pacto modificata. Quamquam non assentimur Veslingio, Redio, (2) & aliis quibusdam recentioribus Botanicis, qui obsoletam de *sensu Plantarum* opinionem (3) suadere conantur; Nihiloninus, cum illarum intimi motus (4) sint admodum analogi vitalibus ceterorum viventium motibus, asserimus cum Scriptura & Patribus (5) plantas vivere vitam infimi ordinis, nempe tantummodo vegetativam.

De sensu & sensibili.

XXXII. **S**ensus alius internus est, alius externus. Internum in cerebro residere, apud Recentiores non controvertitur. Cum vero ex observationibus anatomicis constet vitiari posse partem aliquam cerebri non vitiato sensu interno. (6) Hinc dissidium est in determinanda parte, quae sit propria sensus interni sedes. Hanc alii cum Kenelmo Dygbæo (7) constituunt in *septo lucido*, alii cum Vieussens (8) in *centro ovali*, alii in *plexu Choroidæ* &c. itaut numerus opinionum, numerum fere partium, quæ ad hunc diem observatæ in cerebro sunt, æmuletur. Sententia tamen Cartesii sensum internum in *Conario* col-

vens. Fame & siti laborare dicuntur Ps. 4. & 48. Demum de vi eorumdem cognoscitiva mentio fit Genesios 3, Isai. 1, Hierem. 8, Job 39. Joann. 10, & alibi.

- (1) S. Aug. De vera Relig. cap. 29. *Irrationabilia quoque animantia vivere, atque sentire nemo ambigit.* In eandem sententiam plura habet Dial. de Quant. Anima c. 28, item. 27. de verb. Ap. lib. 1. de lib. arb. c. 8. lib. 10. Conf. c. 17. &c. Accedunt Hieron. in Matt. c. 26, Greg. Niss. de hom. opif. c. 8, Ambr. Hexamer. lib. 5. c. 1, Greg. P. Hom. 29. in Evang. & alii communiter.

- (2) A pag. 147. usq. ad 155. Edit. Flor. An. 1668.

- (3) Franc. Redi ibid. pro illa recenset Platonem, qui plantas vocavit *animallu radi-ebus connexa*, Anaxagoram, Democritum, & Empedoclem, qui, teste Laertio ap. Cassendum, venditabat se olim & fruticem, & volucrem, & piscem fuisse.

- (4) Ex iis, quæ de intima, planeque mira plantarum structura observarunt præ cæteris sollicitissimus Malpighius, & Nehemias Grevius, colligunt recentiores ea-

rum nutritionem esse admodum analogam nutritioni viventium. In iisdem dari humorum circuitum, & pluribus experimentis probari potest, & exactissimo etiam microscopio a se observatum testatur Bradleyus in folio cucurbitæ ad solem transposito. (Mem. litt. de la G. Brett. to. 8. pag. 497.) Demum nec respirationem plantis deesse opinatur Malpighius in sua Plantarum Anatomie, quæ quidem opinio conjecturis nititur non improbabilibus.

- (5) S. Aug. Serm. 27. de verbis Ap. *Nobis vivere cum arboribus commune est, dicuntur enim & vites vivere: nam si non viverent, non scriptum esset. Psal. 77. Occidit in ordine vineas: vivit vitis, cum viret, orefficit cum moritur: sed vita ista non habet sensum.* Similia habet S. Greg. P. Homil. 29. in Evang. & alii.

- (6) Isbr. Diemmerbroeck lib. 3. Anat. cap. 10. narrat Juvenem, cui apostema obortum, in cerebro usque ad superiores ventriculos penetraverat, vixisse ad septem menses interno sensu incolumi.

- (7) Ap. Tho. Barthol. lib. 3. Anat. cap. 6.

- (8) Hist. de l'Acad. 1709.

collocantis passim rejicitur a recentioribus anatomicis, eam glandulam inter excretorias recensentibus: cum & arenas, & calculos in ea reperit Sylvius, (1) & Schuylius lapillum dimidiam glandulam occupantem; (2) immo Eq. Edmundus King (3) totam ipsam glandulam pinealem lapideam invenerit. Nobis incerta est propria sedes interni sensus: immo incertum etiam num unica sit, an multiplex cerebri pars ad internum sensorium pertinens: Cum enim ob varias functiones dividatur passim in *sensum communem*, Phantasiam, seu *imaginativam*, & *Memoriam*, alii suum singulis in cerebro distinctum organum attribuunt; alii vero unum omnibus commune, quod dum affectiones externorum sensuum recipit, *sensorium commune* dicatur: *Phantasia* vero prout illas affectiones independenter ab externorum sensuum motu, iterare aptum est; Memoria demum, prout prateritarum affectionum vestigia impressa conservat. Quod quamquam verisimilem videtur; malum tamen hac de re nihil dehinire.

XXXIII. Notissimos quinque sensus externos & loco & structura inter se differre nemo dubitat. Externi dicuntur, quod illorum organa, extra cranii cavitatem natura constituerit in ultimis derivationibus nervorum respectivè cognominum, per quorum videlicet intimas exilissimas fibras ope spirituum animalium affectio quælibet ab externis objectis excitata ad ipsum usque cerebrum traduceretur, ibique in unum veluti collectas haberet *anima sensibilia* objectorum species per sensus hausas, quarum deinde ministerio ad nobiliores cognitiones progredieretur. Cum autem externa hujusmodi sensoria pluribus singula consent partibus miro plane artificio constructis, & ad finem cuique proprium ordinatis, non satis conveniunt Philosophi in determinanda parte, quæ sit proprium, & immediatum uniuscujusque organum. Dicimus itaque proprium *visus* organum male a Galeno (4) & veteribus Peripateticis in *humore crystallino* collocatum fuisse, cum ejus usus sit, ut in lentibus opticis, radios lucis refractione colligere, quo distinctior fiat visio. (5) Quæ vero momenta congerit Cl. Mariotte (6) pro tunica *choroide*, tanti non sunt, ut a communi recentiorum opinione recedendum sit, organum visus in *Amphiblastroide*, seu *retina* constituentium, quibus nos etiam subscribimus. Immediatum sensorium auditus neque est membrana tympani, ut putat Honor. Fabri (7) cum etiam læso, immo & pertuso tympano. (8) fiat auditio; neque aer, qui olim putabatur innatus, atque implantatus tym-

(1) Ap. Diemerbr. lib. 3. cap. 6.

(2) Ap. Bartholinum ibid.

(3) Transact. Anglie. Novemb. 1686.

(4) De usu partium lib. 8. cap. 6.

(5) Visionem fieri etiam sine crystallino constat ex Historia Acad. Parisi, ad an. 1708.

(6) Ap. Du Hamel. Phys. par. 3. Disp. 3. cap. 5, qui in eandem sententiam propendit.

(7) Lib. 2. de Homine, cap. 57. num. 5 & 6.

(8) Ut testatur Du Hamel cap. 4. de corpore animato, & constat tum experimento cauris, qui tympano ex industria diffracto audiebat, ut refertur in monum. litter. magnæ Britan. to. 20; Tum etiam eorum testimonio, qui vitio hujus membranz laborantes, sonum, quem per auriculas percipere nequeunt, ore hiant percipiunt.

tympano, (1) cum neque sit pars organica cum cerebro continuata, neque differat a comuni aere, quem spiramus, cum quo videlicet communicat per *tubam Eustachianam*; Sed sunt exiles illæ membranæ, quæ *cochleæ*, & *labyrinthi* recessus intimos pervadunt, & *zonæ sonoræ* appellantur. Gustus organum constituimus cum Malpighio (2) & recentioribus communiter in papillis nerveis, quæ in linguæ potissimum apice & basi frequentiores observantur, ubi exquisitior est gustus. Ad olfactus organum quod spectat, veteres plures cum Galeno, & Avicenna, illud constituebant in duabus illis cerebri productionibus ossi Ethmoidi indidentibus, quas *processus mamillares* appellant, quam sententiam sequi sunt ex recentioribus Gassendus (2) & Ant. le Grand (3) Verum, probabilius asseritur consistere in *membrana crispata* lamellas narium continuo ductu convescente. Demum tactus organum esse dicimus quaslibet fibras nerveas per totum corpus diffusas, siquidem sermo sit de communi tactu ad intimas pariter, atque extimas corporis partes pertinente. Quod si agatur de tactu exquisitior, quo varias tactilium qualitatum differentias internoscimus, ejus proprium sensorium constituimus in *papillis nerveis ex plexu reticulari* prominentibus.

De Coloribus.

XXXIV. **A**fferimus cum Cl. Newtono Lucem non esse homogeneam, sed constare septem diversis speciebus, quibus correspondet tum inæqualis gradus refrangibilitatis, tum certus & immutabilis color, quem *Primum* dicimus. Septem itaque sunt hujusmodi colores Primarii, nimirum *Ruber*, *Aureus*, *Flavus*, *Viridis*, *Ceruleus*, *Indicus*, & *Violaceus*: Et ruber quidem exhibetur a radiis minime omnium refrangibilibus; reliqui vero radii eò majorem habent refrangibilitatis gradum, quo colores exhibent a rubro magis distantes juxta seriem expolitam. Ex coloribus autem primigeniis variè conjugatis & permixtis innumeri penè secundarii colores refultare possunt. Hinc dicimus colores omnes in ipsa lucis natura consistere: Corpora verò eatenus hunc, vel illum colorem exhibere, quatenus eorum textura, & superficies apta est hanc vel illam radiorum speciem, aut specierum conjugationem cæteris copiosius ad oculum vel regerere, si opaca sint, vel trajicere si sint diaphana.

De

(1) Quam sententiam Aristoteli tribuit Gassendus Phys. sect. 3. memb. post. lib. 7. cap. 4.

(2) Ap. Barthol. lib. 3. Anat. cap. 13.

(3) Sect. 3. Phys. memb. post. lib. 7. cap. 3.

(4) In animadv. ad Phys. Rohaul. p. 555.

De Sono.

XXXV. **O**bjectum auditus, nempe sonus, quamvis causaliter acceptus importet vim aliquam activam accidentalem; Si tamen formaliter accipiat, non consistit in qualitate absoluta a corpore sonoro de novo producta, sed in motu aeris, ut sæpe insinuat Aristoteles. Non tamen quilibet aeris motus sonus est: Rejicimus enim hypothese[m] P. Honorati Fabri sonum constituentis in motu progressivo particularum aeris, & molecularum. (1) Dicimus itaque sonum formalem esse motum tremulum & elasticum, quo singulæ aeris particule vibrant folliculorum instar sese in figuram pristinam restituentium: Quidquid vero hunc aeri tremorem conciliat, sonus causalis appellatur.

De Odoribus & Saporibus.

XXXVI. **A**d explicandos odores & sapes, prout significant respectiva objecta olfactus, & Gustus, necesse non est adstruere peculiæres qualitates absolutas contradistinctas a quantitate, & impetu. His enim suppositis, aptitudo excitandi determinatam affectionem sive in fibris membranæ crispatæ narium, sive in papillis linguæ, refundi potest in certam figuram, mole[m], & motum corpusculorum sive ab odoris corporibus effluentium, sive dissolutorum ex sapidis.

De origine Fontium.

XXXVII. **E**X Calculis sive Edmundi Halley circa evaporationem Mediterranei, sive Mariotte circa sequanam, sive Annotatoris circa Danubium, Eridanum &c. non conficitur aquas continenti desuper tantummodo suppeditari per pluvias, nives, rorem &c. Quin immo ex aliis observationibus evincitur non sufficere, aquas pluvias ad omnes usus continentis: Adeoque præcipuos fontes, & fluvios perennes immediate oriri ab aquis maris per terræ viscera derivatis ad fontium scaturigines.

XXXVIII. Difficultas explicandi quonam pacto aquæ maris supra Libellam attollantur, spolientur salibus, & potabiles evadant, I. quidem non infirmat momenta rationum suadentia quod aquæ maris reapse ascendant per terræ viscera, & dulcescant: Plura enim sunt quæ a natura fieri novimus, & nihilominus, quo modo fiant, ignoramus. II. verò solvitur satis probabiliter dicendo maris aquas eodem modo, & ex similibus causis sublimari & dulcescere tum infra, tum supra terræquei globi superficiem, nimirum evaporatione.

EX

(1) Traët. 3. Phys. lib. 2. de Sonis Propos. 20.

EX METAPHYSICA

DE DEO O. M.

XXXIX. **D** eum existerē demonstrari potest a posteriori tum ex principiis moralibus sub confusa idea supremi Numinis cuncta moderantis, tum etiam ex principiis physicis sub idea *Entis a se, & necessariò existētis*, postulata tamen repugnantia puri casus Philosophici, & mutue causalitatis in eodem genere physico, & quantum ad primum esse.

XL. Ex ipso conceptu *Entis a se naturali* ratiocinio demonstratur tum essentialis ejusdem *unitas, & singularitas*: tum *Omnimoda perfectio infinita prorsus, & illimitata*: tum etiam *Simplicitas*, saltem spectata ratione abstracta & generica perfectionis: Quo enim pacto peculiare perfectiones invicem apparenter pugnant conciliantur, problema est Theologis relinquendum.

XLI. Quavis Deus, utpote incausatus demonstrari non possit propriè loquendo *a priori*: potest tamen ejus existentia evidenter deduci ex idea *Entis Optimi*, quin assumatur pro antecedente absoluta existentia, ullius entis creati, quod ratiocinium, cum neque sit *a posteriori*, neque simpliciter *a priori*, dici solet *a quasi priori*, estque potius ratiocinium animæ ad seipsam, quam ad alios, qui pervertendo communes ideas, vim demonstrationis facilè declinant. Hinc ad alios revincendos postulandum est, ut communes idæ stables & firmæ retineantur juxta usitatam acceptionem: v. c. nomine *Entis* veniat ratio quædam positiva contradistincta ab impossibili, & secundum se præseindens a qualibet differentia: nomine *limitati, & imperfecti* id, quo melius aliquid esse possit &c.

XLII. Deus ex munere causæ primæ concurret physice immediate ad omnes & singulas actiones causarum secundarum, quarum insufficientiam complet in actu primo juxta uniuscujusque causæ indolem, & conditionem: Nimirum causas necessarias per Decretum determinatum ad unum: causas verò liberè agentes per Decretum indifferens ad utramque partem contradictionis. Concursum verò prævium consistentem in Physica Prædeterminatione per se immediatè connexa cum actu, ad quem datur, & soli Deo libera, itaut creatum arbitrium ad illam sive aquirendam, sive impediendam, sive abjiciendam, potestatem non habeat, non modo nulla ratione probari contendimus, verum etiam arbitramur cum creata libertate conciliari non posse.

De Anima Rationali.

XLIII. **A**nima Rationalis etiam secundum Philosophiam est substantia *Spiritualis*, naturaliter *Immortalis*, & *Libera libertate indifferentiæ* ad plures suos actus. Conceptum autem veræ libertatis indifferentiæ constituimus in *facultate arbitria*, quæ positis omnibus ad agendum prærequisitis, adeoque dum proximè potest agere, potest proximè non agere, nec aliunde, quam ex proprio libito ad unum præ alio immediatè determinatur.

XLIV. In uno eodemque homine non coexistunt simul plures animæ diversæ rationis, nimirum neque tres; quarum una sit *Rationalis*, alia *Sensitiva*, alia *Vegetativa*; Neque duæ, quarum una sit *Spiritualis*, alia *Materialis*, ut opinatur Gassendus: (1) Sed una omnino, quæ simul & rationalis sit, & sensitiva, & vegetativa, ut videtur colligi posse etiam ex indefinito loquendi modo, quo utitur octava Synodus Manichæorum hæresim damnans. (2) Neque demum iis assentimur, qui animationem foetus humani successivè fieri docent, primò quidem per animam vegetativam, deinde per sensitivam, ultimò per rationalem.

XLV. Quamvis præcipuæ functiones Animæ rationalis in cerebro perficiantur, quod proinde illius quasi arx, & potissima sedes appellatur; Non inde tamen sequitur illam aut in solo cerebro, aut in aliqua tantum ejus parte residere. Afferimus itaque Animam rationalem non uniri immediatè soli cerebro, sed aliis etiam partibus organicis cum cerebro communicantibus: Sanguinem vero, aliosque humores inter partes humani corporis propriè animatas non recensemus. Non modo sensationes causales, verum etiam formales ipsi actus sentiendi non in solo cerebro fiunt, sed in propriis etiam respectivè organis externis ab eodem derivatis.

L A U S D E O.



(1) Phys. sect. 3. memb. post. lib. 3. cap. 4.

(2) VIII. Synod., quæ est Constantinop. IV.

Aët. 10. Can. 10. sic habet: Cum veteri, novaque lex testamenti doceat unicam homini, eamque ratione, & intelligentiæ potentiam, esse animam; eandemque sententiam Dei-loquentium omnium Patrum, & Doctorum Ecclesiæ doctrina confirmet; sunt tamen qui duas homini esse animas asserant, & quibusdam visiosis ratiocinationibus suam hæresim stabiliant. Itaque sancta hæc, & Oecumenica Synodus, hujus impietatis conditores cum tota scella sua, magna voce anathematizans. Ita habet Edit. Græco-latina ex versione Matth. Raderi in Collect. La-

bzi & Coll. To. 8.

Indefinita pariter ponitur damnatio duplicis animæ in Collect. Severini Bini Col. Agrip. an. 1606. ubi inter fragmenta octavæ Synodi sub hoc tit: Quod unica sit homini anima, sic ponitur Can. X. Apparet quosdam id temporis in tantum impietatis venisse, ut hominem duas animas habere impudenter dogmatisarent. Tales igitur, & similia sentientes &c.

Demum indefinita etiam legitur in Edit. lat. ex interpretatione Anastasii, five typis R. C. A. jussu Pauli V. An. 1612. five in collect. Lab. & Coll.